

Odluka kojom se produžava mandat supervizora obavještajno-sigurnosne reforme

Koristeći se ovlaštenjima koja su visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik “pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora”;

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim “donošenjem obavezujućih odluka, kada ocijeni da je to neophodno”, o određenim pitanjima, uključujući i (prema tački (c) stava XI.2) “mjere kojima se obezbjeđuje implementacija Mirovnog sporazuma na cijeloj teritoriji Bosne i Hercegovine i njenih entiteta”;

Pozivajući se dalje na član III.5(a) Ustava Bosne i Hercegovine, kojim se utvrđuje da će “Bosna i Hercegovina preuzeti nadležnost”, pored ostalog, u stvarima “koje su

potrebne za očuvanje suvereniteta, teritorijalnog integriteta, političke nezavisnosti i međunarodnog subjektiviteta Bosne i Hercegovine”;

Potvrđujući donošenje Zakona o Obavještajno-sigurnosnoj agenciji Bosne i Hercegovine (“Službeni glasnik Bosne i Hercegovine” broj 12/04 od 14. aprila 2004. godine) u cilju osiguranja nezavisnih informacija i nalaza vezano za prijetnje postojanju ili ustavnom poretku Bosne i Hercegovine i djela kažnjiva po međunaradnom pravu;

Konstatirajući da je Obavještajno-sigurnosna agencija Bosne i Hercegovine (u daljem tekstu: Agencija) postala operativna 1. juna 2004. godine i posebno, imenovanje generalnog direktora i zamjenika generalnog direktora Agencije, te formiranje Sigurnosno-obavještajne komisije Parlamentarne skupštine Bosne i Hercegovine;

Vodeći računa o tome da osiguravanje poštivanja međunarodno priznatih ljudskih prava u Bosni i Hercegovini u radu Agencije, uključujući i prava iz Evropske konvencije za zaštitu ljudskih prava i temeljnih sloboda i njenih protokola, zahtijeva jačanje novouspostavljenih institucionalnih struktura u okviru obavještajno-sigurnosnog sektora, kao i daljih reformi kojima bi se osiguralo pravilno unutrašnje rukovođenje i kontrola;

Pozivajući se na ranije odluke visokog predstavnika, Odluka br. 217/04 od 18. juna 2004. godine o imenovanju supervizora za obavještajno-sigurnosnu reformu (“Službeni glasnik Bosne i Hercegovine”, br. 31/04 od 12. jula 2004. godine), prema kojoj je prvi mandat gospodina Kalmana Kocsisa istekao 31. decembra 2004. godine, i Odluka br. 327/04 od 17. decembra 2004. god. kojom je produžen mandat supervizora obavještajno-sigurnosne reforme (“Službeni glasnik Bosne i Hercegovine”, br. 63/04 od 31. decembra 2004. godine), prema kojoj produženi mandat gospodina Kalmana Kocsisa ističe 30. juna 2005. godine, te prepoznajući potrebu za ponovnim produženjem mandata

supervizora, sa istim obimom ovlaštenja koji je utvrđen i definiran u Odluci o njegovom imenovanju, u cilju, između ostalog, daljeg jačanja institucionalnih struktura Agencije i razvoja funkcionalnog i modernog obavještajno-sigurnosnog sektora u Bosni i Hercegovini;

Razmotrivši, uzevši u obzir i imajući na umu sve gore navedeno visoki predstavnik ovim donosi sljedeću:

ODLUKU

kojom se produžava mandat supervizora obavještajno-sigurnosne reforme

Član 1.

Ovom Odlukom se produžava mandat gospodina Kalmana Kocsisa u svojstvu supervizora obavještajno-sigurnosne reforme (u daljem tekstu: supervizor), do 31. decembra 2005. godine.

Član 2.

Gospodin Kalman Kocsis nastavlja djelovati kao supervizor sa istim obimom ovlaštenja koji je utvrđen i definiran Odlukom visokog predstavnika br. 217/04 o imenovanju supervizora obavještajno-sigurnosne reforme.

Prioritete u izvršavanju ovlaštenja supervizora iz stava 1. ovog člana i način izvršavanja navedenih ovlaštenja utvrđuje visoki predstavnik.

Član 3.

Ova Odluka stupa na snagu odmah i odmah se objavljuje u «Službenom glasniku Bosne i Hercegovine».

Sarajevo, 4. juli 2005.
godine
Paddy Ashdown

Visoki predstavnik